

## Allannguutissatut siunnersuut

uunga

**Uunga siunnersuut: Piniarneq aallaaniarnerlu pillugit Inatsisartut inatsisaat**

Pingajussaaneerneqarnissaanut suliarineqartussanngorlugu Naalakkersuisunit saqqummiunneqartoq.

## § 1-mut

1. § 2, imm. 1, nr. 2 imatut oqaasertaqalissaaq:

“2) biologit siunnersuinerat nalinginnaasoq aamma piniartut atuisullu ilisimasaat pissarsiarineqarsinnaasut naapertorlugit naapertuuttumik ukiullu qanoq ilinera najoqqutaralugu pitsaanerpaamik atorluaanissaq, nalilersuinernilu oqimaaqatigiissumik naligiissinneqassasut,”

## § 5-imut

2. § 5, imm. 1, imatut oqaasertaqalissaaq:

”Kalaallit Nunaanni Aalisarsinnaanermut Akuersissutinik Nakkutilliisoqarfiup nakkutilliinermik oqartussaasutut Inatsisartut inatsisaanni matumani aalajangersakkat malinneqarnersut misissugaralugillu nakkutigisassarai.”

## § 7-mut

3. § 7, imm. 1, nr. 2 ima oqaasertalerneqassaaq:

”2) Kalaallit Nunaanni aalajangersimasumik najugaqartunut aamma qaammatini kingullerni 24-ni Kalaallit Nunaanni aalajangersimasumik najugaqarsimasunut, taamaattorli takuuk § 10, imm. 1. nr. 1,”

4. § 7, imm. 1, nr. 3 ima oqaasertalerneqassaaq:

”3) Kalaallit Nunaannut tamakkiisumik akileraartussaataasunut aamma qaammatini ullorsiuteqarfiusuni kingullerni 24-ni Kalaallit Nunaannut tamakkiisumik akileraartussaataasimasunut.”

## § 12-imut

5. § 12, imm. 3-4 ima oqaasertalerneqassapput:

” Imm. 3. Imm. 2-mi aalajangersagaq apeqqutaatinnagu aqutsiveqarfimmi pineqartumi pisassiissutit killilersugaanngippata imaluunniit uumasogatigiit siaruaassimaffiat kommunini

arlaqartuniissimassappat aamma aqutsiveqarfinni arlaqartuniissimassappat, qinnuteqareernermi pissutsini immikkut ittuni inuit aqutsiveqarfimmi allami najugaqartut aqutsiveqarfimmi allami piniarsinnaanerat Aalisarnermut Piniarnermullu Naalackersuisoqarfiup akuerisinnaavaa.

*Imm. 4.* Uumasunut pisassiiffiusartunut akuersissutinik akuersissuteqarnernullu agguaassinermi piniutinik angallatinillu pisariaqartunik peqartoqarnissaanik Naalackersuisut piunasaqaasiorsinnaapput.”

## § 13-imut

**6.** § 13, imm. 7 ima oqaasertalerneqassaaq:

” *Imm. 7.* Piniakkanut killilersukkanut akuersissut aamma inuussutissarsiutigalugu piniarsinnaanermut akuersissuteqarneq piunasaqaateqarfusinnaavoq, inuk pineqartoq akuersissummik tunniussisoqarnissaa sioqqullugu nunap immikkoortuani aqutsiveqarfiusumi qinnuteqarfigineqartumi minnerpaamik qaammatini pingasuni ataannartumik najugaqarsimanerminut uppersaateqassasoq.”

**7.** § 13-imi imm. 8 aamma imm. 9, ima ilanngunneqassapput:

” *Imm. 8.* Meeraq aqqaneq-marlunnik ukioqalereersimasooq sulili 15-inik ukioqalersimanngitsoq piniarnermut aallaaniarnermullu peqataasinnaavoq piunasaqaatit tulliiiniittut malillugit:

- 1) Meeraq aallaammik nassataqarsimappat aamma meeqqap igeriarnerani, meeqqap angajoqqaavinit nakkutiginnittumilluunniit allaganngorlugu akuersissummik peqarnikkut, meeqqap angajoqqaavisa, nakkutiginnittuata imaluunniit inuup 18-inik ukioqalereersimasup meeraq 1 meterisut qanitsigalugu ilitersussavaa.
- 2) Aallaasip sulloqqortussusia inatsimmi atuutsinneqartoq qaqugukkulluunniit malinneqassaaq.
- 3) Inuk meeqqamik ilitersuisuusoq, piniarnermut aallaaniarnermullu pineqartumut akuersissummik atuuttumik peqassaaq.

*Imm. 9.* Uumasut meeqqamit pisarineqartut imm. 8-mut ilaasut, inummit piniarnerup nalaani meeqqamut ilitersuisumit pisatut nalunaarsorneqassapput.”

## § 14-imut

**8.** § 14-imi, imm. 3 aamma 4, ima ilanngunneqassapput:

” *Imm. 3.* Meeraq aqqaneq-marlunnik ukioqalereersimasooq sulili 15-inik ukioqalersimanngitsoq piniarnermut aallaaniarnermullu peqataasinnaavoq piunasaqaatit tulliiiniittut malillugit:

- 1) Meeraq aallaammik nassataqarsimappat aamma meeqqap igeriarnerani, meeqqap angajoqqaavinit nakkutiginnittumilluunniit allaganngorlugu akuersissummik peqarnikkut, meeqqap angajoqqaavisa, nakkutiginnittuata imaluunniit inuup 18-inik ukioqalereersimasup meeraq 1 meterisut qanitsigalugu ilitersussavaa.

2) Aallaasip sulloqqortussusia inatsimmi atuutsinneqartoq qaqugukkulluunniit malinneqassaaq.

3) Inuk meeqqamik ilitsersuisuusoq, piniarnermut aallaaniarnermullu pineqartumut akuersissummik atuuttumik peqassaaq.

*Imm. 4.* Uumasut meeqqamit pisarineqartut imm. 3-mut ilaasut, inummit piniarnerup nalaani meeqqamut ilitsersuisumit pisatut nalunaarsorneqassapput.”

#### § 19-imut

9. § 19 aamma immikkoortumut qulequtaq pineqartoq peerneqarpoq.

#### § 25-mut

10. § 25, imm. 2 ima oqaasertalerneqassaaq:

“ *Imm. 2.* Ataatsimoorluni piniarnermut atatillugu peqatigiiffiit kattuffiillu ataatsimoorluni piniarnermut aqutsisussamik toqqaasinnaanissaannik Naalakkersuisut pisinnaatitsisinnaapput.”

#### § 26-imut

11. § 26, imm. 2 ima oqaasertalerneqassaaq:

“ *Imm. 2.* Uumasunik piniakkanik aalajangiiniarnermi toqunartut, nammineq seqqortussiat, kiisartut, nigarsiniutit teknikkikkulluunniit atortut allat atornissaat inerteqqutaavoq. Tamannali piniakkanut imaaniittunut atuutinnilaq, taakku unaaq tuukkartalik imaluunniit atortulersuut assingusoq atorlugu aalajangersorneqaqqusaammata kiisalu puisinniarnermut aamma qilalukkanik qaqortanik qernertanillu piniarnermut qassutit atoqqusaammata.”

#### § 34-mut

12. § 34, imm. 1-2 ima oqaasertalerneqassapput:

” Kattuffinniit suliffeqarfinniillu, piniarnermut aallaaniarnermullu akuusartunik, inuttaqartumik Piniarneq pillugu Siunnersuisoqatigiinnik Naalakkersuisut pilersitsissapput. *Imm. 2.* Piniarneq pillugu Siunnersuisoqatigiit katitigaanerat ilaasortaasullu amerlassusissaat pillugit maleruagassanik Naalakkersuisut aalajangersaassapput.”

#### § 40-imut

13. § 40, imm. 1, ima oqaasertalerneqassaaq:

“ Makku pissutigalugit akiliisitsinermik kinguneqarsinnaapput:

1) § 6, imm. 1, § 12, imm. 1, § 13, imm. 7-9, § 14, imm. 3-4, § 16, imm. 1 aamma 2, § 22, § 23, imm. 1-4, aamma 6-7, § 24, imm. 3, § 25, imm. 4, § 26, imm. 1-3 aamma imm. 6, § 30, imm. 2, aamma § 31, § 32, imm. 1, 3 aamma 4, § 33, imm. 2, aamma § 41, imm. 2, aamma

maligassanik § 15, imm. 1, § 16, imm. 4, §§-it 17-21, § 24, imm. 4 aamma 5, § 25, imm. 1, § 26, imm. 4, 5, aamma 7, § 28, imm. 2, § 29, § 30, imm. 1, § 32, imm. 5, § 36, imm. 2, aamma § 39 naapertorlugit aalajangersarneqarsimasunik unioqqutitsinerit.

2) § 35, imm.1-3, § 36, imm. 1, § 37, aamma § 46 malillugit peqqusissummik nalunaarutigineqarsimasumik malinninnginnerit, kiisalu § 37 malillugu inerteqqusummik nalunaarutigineqarsimasumik unioqqutitsinerit,

3) Inatsisartut inatsisaat naapertorlugu akuersissuteqarnermut, taassuma ataani immikkut akuersissuteqarnerit, Inatsisartut inatsisaat malillugu maleruagassat atuutilersinneqarsimasut ilaginnarneqarpata, aamma

4) Inatsisartut inatsisaanni piumasarineqartunik imaluunniit Inatsisartut inatsisaat malillugu maleruagassat atuutilersinneqarsimasut naapertorlugit pisortanut oqartussaasunut eqqunngitsunik paatsuungatitsisinnaasunilluunniit paasissutissiisoqarpat, pisortanut oqartussaasunut pisussaaffik malillugu paasissutissiisoqanngippat, aamma

5) § 38 malillugu nakkutilliinermi oqartussanik isertitsinngitsoq.”

#### § 48-mut

14. § 48, imm. 1 ima oqaasertalerneqassaaq:

“ Inatsisartut inatsisaat juulip aallaqaataani 2023-mi atortuulissaaq.”

Allannguutissatut siunnersuummut nassuiaatit

#### **Nassuiaatit nalinginnaasut**

Piniarneq aallaaniarnerlu pillugit Inatsisartut inatsisaata allanngortinneqarnera pillugu Inatsisartut inatsisissaattut siunnersuut inatsisilerinermi teknikikkut misissoreerneratigut naqqiuteqarfigineqarnissaa siunnersuutigineqarpoq, tassami siunnersuummi §§-t 5 aamma 12 inatsisilerinermi teknikikkut naapertuutinnngitsut malugineqarmat. Qallunaatut kalaallisullu oqaasertalerneqarneri ilaatigut assigiinngissuseqarput. Taamaalilluni allannguutissatut siunnersuummi siunnersuutip aalajangersagartaasa oqaatsit marluk atorineqartut eqqortumik oqaasertalerneqarnissaat siunertaavoq.

§ 2-mi siunnersuutigineqarpoq biologit inassuteqaataat kiisalu piniartut atuisullu ilisimasaasa nalilersuinerni oqimaaqatigiissumik naliigiissinneqarnissaat.

Tamatuma saniatigut meeqqanut aqqaneq-marluleereersimasut sulili 15-liisimannngitsut angajoqqaanit, nakkutiginnittumik imaluunniit 18-t sinnerlugit ukioqalereersimasumik ingiaqateqarlutik uumasunik pisassiissutaasartunik piniarnermut aallaaniarnermullu periarfissaqarnissaat siunnersuutigineqarpoq (Perngarneq).

Aammattaaq siunnersuutigineqarpoq § 19 aallaaniarsinnaanermut misilitsinnermut tunngasoq peerneqassasoq.

Kiisalu siunnersuutigineqarluni atuutilersitsinnermut ullua nalimmassarneqassasoq, taamaasilluni Inatsisartut inatsisaat siunertarineqanngitsumik piffissamut qaangiutereersumut atuutsinnissaa, inatsisissamut siunnersuutip aappassaarneqarnerata pingajussaarneqarneratalu upernaakkut ataatsimiinnermi 2022-miit maannakkut katersuunnermut kinguartinneqarneratigut.

Siunnersuummi § 19-p peerneqarneratigut allannguutissatut siunnersuut allanik aningaasatigut allaffissornikkulluunniit pisortanut kinguneqassanngilaq, aallaaniarsinnaanermut misilitsinnissap pilersinnissaa ingerlanneqarneralu eqqarsaatigalugit.

Allannguutissatut siunnersuut taassuma saniatigut allaffissornikkut imaluunniit aningaasaqarniarnermut kinguneqanngilaq.

### **Allannguutissatut siunnersuummi aalajangersakkanut ataasiakkaanut nassuiaatit**

#### Nr. 1-imut

Siunnersuutigineqarpoq biologit inassuteqaataat aamma piniartut atuisullu ilisimasaasa nalilersuinerit ingerlaneranni naligiissinneqassasut.

#### Nr. 2-imut

Allannguut teknikkkut naqqiissutaavoq, tassami Kalaallit Nunaanni Aalisarsinnaanermik Akuersissutiniq Nakkutilliisoqarfiup Inatsisartut inatsisaat tamakkerlugu malinneqarnerasoq nakkutigisarimmagu, taamaallaallu Inatsisartut inatsisaanni kapitali 7-mi aalajangersakkat pinnagit.

#### Nr. 3-mut

§ 7, imm. 1, nr. 2)-mut

Inatsisissatut siunnersuummi kalaallisoortaani allannguut naqqiissutaavoq.

#### Nr. 4-mut

§ 7, imm. 1, nr. 3)-mut

Inatsisissatut siunnersuummi kalaallisoortaani allannguut naqqiissutaavoq.

#### Nr. 5-mut

§ 12, imm. 3-4-mut

Inatsisissatut siunnersuummi kalaallisoortaani allannguut naqqiissutaavoq.

## Nr. 6-imut

### § 13, imm. 7-mut

Inatsisissatut siunnersuummi kalaallisoortani allannguut naqqiissutaavoq.

## Nr. 7-imut

### Imm. 8-mut

Meeqqat 12-it aamma 15-it akornanni ukiullit sulii piniariarsinnaanissaat aallaaniarsinnaanissaallu isumannaarumallugu, imm. 3-mi taanna periarfissaalerpoq, inersimasumik piniartumik ilaqarluni piniarnermut aallaaniarnermullu peqataanissamut piumasagaatit nr. 1-3-miittut matumani eqquutsinneqarsimappata.

### Nr. 1

Meeraq ilaqtaminik 18-inik ukioqalereersimasumik ilaqarluni piniariarnerorusuttarpoq. Meeqqamut angajoqqaajusoq imaluunniit akisussaataasooq pineqanngippat, piniarnerup aallaaniarnerullu nalaani meeqqap angajoqqaavisa imaluunniit akisussaataasup inuk 18-inik ukiulik meeqqamut ilitsersuisuunissaanut allaganngorlugu akuersisummik tunissavaat. Meeraq aallaammik timmiarsiummilluunniit nammatassaminik aallaaniutissaminilluunniit tigusaqarsimappat, angajoqqaajusoq, akisussaataasooq imaluunniit alla ilitsersuisooq 1 meterimik qaninnerusumiissaaq.

### Nr. 2

Tassani aallaasit sulloqqortussusia pillugit malittarisassanik erseqqinnerusumik Namminersorlutik Oqartussat nalunaarutaanni piumasagaatitalerneqarput. Meeqqamik ilitsersuussisup eqqanaassavaa aallaasip sulloqqortussusitaa inatsisitigut atoqqusaasut eqqortuunissaa, taamaasillunilu malittarisassani atuuttuni piniakkamut pineqartumut sulloqqortussutsimut minnerpaaffiliinikkut atoqqusaasumut naapertuuttuunissaa.

Taassuma saniatigut meeqqamik ilitsersuussisup eqqanaartariaqarpaa, aallaasip sulloqqortussusitaa meeqqap ukiuanut pisinnaasaanullu naleqquttuunissaa, kiisalu eqqanaarlugu meeraq pisariaqanngitsumik sakkortuallaamik aallaasip toorsineranit eqqortinnginnissaa. Imatut paasillugu meeraq sakkumik angivallaartumik tunineqassanngitsoq malittarisassani aalajangersakkanut sanilliullugu.

### Nr. 3

Inuk meeqqamut ilitsersuisuusoq, angajoqqaajusoq, akisussaasuusoq imaluunniit inersimasooq akisussaataasooq, nammineerluni uumasumik piniarneqartumik aallaanninnissamut aamma uumasut pisassiiffiusartut pineqarpata assersuutigalugu tuttunik nujuartanik piniarnissamut akuersisummik peqartussaavoq.

### Imm. 9-mut

Imm. 8 naapertorlugu inersimasumik ilitersuisoqarluni uumasut pisarineqartut, inersimasup piniarnermut allagartaani akuersissummilu pigisinnaasaani nalunaarsorneqassapput. Eqqortumik pisat nalunaarsorneqarnissaat inersimasup ilitersuisup akisussaaffigaa. Uumasut pisassiiffiusartut pineqarsimappata, inersimasup ilitersuisup piasinnaasaasa amerlassusiannit uumasut pisat ilanngaatigineqassapput.

#### Nr. 8-mut

##### Imm. 3-mut

Meeqqat 12-it aamma 15-it akornanni ukiullit sulii piniariarsinnaanissaat aallaaniarsinnaanissaallu isumannaarumallugu, imm. 3-mi tamanna periarfissaalerpoq, inersimasumik piniartumik ilaqarluni piniarnermut aallaaniarnermullu peqataanissamut piunasaqaatit nr. 1-3-miittut matumani eqquutsinneqarsimappata.

##### Nr. 1

Meeraq ilaqtaminik 18-inik ukioqalereersimasumik ilaqarluni piniariakkajunnerusarpoq. Meeqqamut angajoqqaajusoq imaluunniit akisussaataasooq pineqanngippat, piniarnerup aallaaniarnerullu nalaani meeqqap angajoqqaavisa imaluunniit akisussaataasooq inuk 18-inik ukioqalereersimasooq meeqqamut ilitersuisuunissaanut allaganngorlugu akuersissummik tunissavaat. Meeraq aallaammik timmiarsiummilluunniit nammatassaminik aallaaniutissaminilluunniit tigusaqarsimappat, angajoqqaajusoq, akisussaataasooq imaluunniit ilitersuisooq alla meterimik ataatsimik qaninnerusumiissaaq.

##### Nr. 2

Tassani aallaasit sulloqqortussusii pillugit malittarisassanik erseqqinnerusumik Namminersorlutik Oqartussat nalunaarutaanni piunasaqaatitalerneqarput. Meeqqamik ilitersuisusisup eqqanaassavaa aallaasip sulloqqortussusitaa inatsisitigut atoqqusaasut eqqortuunissaa, taamaasillunilu malittarisassani atuuttuni piniakkamut pineqartumut aallaasip sulloqqortussusitaa atoqqusaasumut naapertuuttuunissaa.

Taassuma saniatigut meeqqamik ilitersuisusisup eqqanaartariaqarpaa, aallaasip sulloqqortussusitaa meeqqap ukiuanut pisinnaasaanullu naleqquttuunissaa kiisalu eqqanaarlugu meeraq pisariaqanngitsumik sakkortuallaamik aallaasip toorsineranit eqqortinnginnissaa. Imatut paasillugu meeraq sakkumik angivallaartumik tunineqassanngitsoq malittarisassani aalajangersakkanut sanilliullugu.

##### Nr. 3

Inuk meeqqamut ilitersuisusooq, angajoqqaajusoq, akisussaasusooq imaluunniit inersimasooq akisussaataasooq, nammineerluni uumasumik piniarneqartumik aallaanninnissamut aamma uumasut pisassiiffiusartut pineqarpata assersuutigalugu tutturnik nujuartanik piniarnissamut akuersissummik peqassaaq.

##### Imm. 4-mut

Imm. 3 naapertorlugu inersimasumik ilitersuisoqarluni uumasut pjarineqartut, inersimasup piniarnermut allagartaani akuersissummilu pigisinnaasaani nalunaarsorneqassapput. Eqqortumik pisat nalunaarsorneqarnissaat inersimasup ilitersuisup akisussaaffigaa. Uumasut pisassiiffiusartut pineqarsimappata, inersimasup ilitersuisup pjarisinnaasaasa amerlassusiannit uumasut pisat ilanngaatigineqassapput.

Nr. 9-imut

Aalajangersagaq siunnersuummiit peerneqarpoq.

Nr. 10-mut

§ 25, imm. 2

Inatsisissatut siunnersuummi kalaallisoortaaani allannguut naqqiissutaavoq.

Nr. 11-mut

§ 26, imm. 2

Inatsisissatut siunnersuummi kalaallisoortaaani allannguut naqqiissutaavoq.

Nr. 12-imut

§ 34, imm. 1 aamma 2

Inatsisissatut siunnersuummi kalaallisoortaaani allannguut naqqiissutaavoq.

Nr. 13-imut

Imm. 1-imut

Allannguut inatsiseqarnikkut teknikimut tunngasumik § 13, imm. 8-mik aamma imm. 9-mik kiisalu § 14, imm. 3-mik aamma imm. 4-mik ilanngussisoqarneratigut malitsigisaanik naqqiissutaavoq.

Nr. 14-imut

Siunnersuutigineqarpoq, Inatsisartut inatsisaat juulip aallaqqaataani 2023 atuutilersinneqassasoq.